

**REGIONAL NEWS UNIT**  
**ALL INDIA RADIO, AGARTALA**  
**Date:17-08-2024**  
**Time: 7.35 - 7.40 AM Hrs**  
**BENGALI MORNING BULLETIN**

---

**IMA :**

পশ্চিমবঙ্গে আর জি কর হাসপাতালে চিকিৎসক ছাত্রীকে নৃশংসভাবে ধর্ষণ এবং খুন সহ ১৫ই আগস্ট হাসপাতালে আন্দোলনরত চিকিৎসক ছাত্রছাত্রীদের উপর হামলার ঘটনার প্রতিবাদে আজ দেশব্যাপী ২৪ ঘণ্টার কর্মবিরতির ডাক দিয়েছে ইন্ডিয়ান মেডিকেল অ্যাসোসিয়েশন বা আই এম এ। সকাল ছয়টা থেকে রবিবার সকাল ছয়টা পর্যন্ত সারা দেশে চিকিৎসকরা কর্মবিরতি পালন করবেন। ইন্ডিয়ান মেডিকেল এসোসিয়েশনের ত্রিপুরা শাখার সভাপতি ডা. সঞ্জীব দেবর্মা জানিয়েছেন, রাজ্যেও চিকিৎসকরা কর্মবিরতি পালন করবেন। তবে, সমস্ত জরুরী চিকিৎসা পরিষেবা চালু থাকবে। রোগীদের চিকিৎসা পরিষেবা দেওয়ার ক্ষেত্রে কিছু বিশেষ পদক্ষেপ নেওয়া হবে। তিনি জানান, রোগীদের স্বার্থে ইমার্জেন্সি বিভাগে চিকিৎসকরা রোগী দেখবেন। কেমোথেরাপি এবং ডায়ালাইসিস পরিষেবা স্বাভাবিক থাকবে। হাসপাতালগুলিতে জরুরী ছাড়া অন্য কোনো ধরনের অস্ত্রোপচার বন্ধ থাকবে। তিনি জানান, ইন্ডিয়ান মেডিকেল এসোসিয়েশনের এই সিদ্ধান্ত জিবিপি এবং আইজিএম হাসপাতাল সহ রাজ্যের সমস্ত জেলা, মহকুমা হাসপাতাল, প্রাথমিক ও সামাজিক স্বাস্থ্যকেন্দ্র, বেসরকারি হাসপাতাল ও নার্সিং হোমগুলিতেও কার্যকর হবে। এদিকে আজ সন্ধ্যায় IMA ত্রিপুরা

শাখার উদ্যোগে এক প্রতিবাদ রেলির আয়োজন করা হয়েছে। রেলিটি IMA হাউস থেকে শুরু হয়ে শহরের বিভিন্ন পথ পরিক্রমা করবে বলে জানিয়েছেন IMA রাজ্য শাখার সভাপতি ডা: সঞ্জীব দেববর্মা ।

\*\*\*\*\*

**Health Ministry :**

চিকিৎসকদের বিরুদ্ধে সহিংসতার ক্ষেত্রে সর্বোচ্চ ছয় ঘণ্টার মধ্যে প্রতিষ্ঠানের প্রধানকে একটি প্রাতিষ্ঠানিক এফআইআর দায়ের করতে হবে বলে কেন্দ্রীয় স্বাস্থ্য মন্ত্রক নির্দেশ দিয়েছে । স্বাস্থ্য পরিষেবার মহানির্দেশক অতুল গোয়েল এই বিষয়ে কেন্দ্রীয় সরকারি হাসপাতাল ও মেডিক্যাল কলেজের প্রধানদের কাছে চিঠি পাঠিয়েছেন। সম্প্রতি কলকাতায় এক চিকিৎসককে হত্যার ঘটনা এবং বিষয়টি নিয়ে আবাসিক চিকিৎসকদের বিক্ষোভের পরিপ্রেক্ষিতে এই নির্দেশ দেয়া হয়েছে। চিঠিতে তিনি বলেন, সম্প্রতি সরকারি হাসপাতালে চিকিৎসক ও অন্যান্য স্বাস্থ্যসেবা কর্মীদের বিরুদ্ধে প্রায়শই সহিংসতা দেখা যাচ্ছে। কিছু স্বাস্থ্যকর্মী দায়িত্ব পালনকালে শারীরিক নির্যাতনের শিকারও হন বল উল্লেখ করা হয়েছে।

\*\*\*\*\*

**Governor-Khowai :**

রাজ্যপাল ইন্দ্রসেনা রেড্ডি নাল্লু গতকাল তেলিয়ামুড়া মহকুমার হদ্রাইস্থিত 'হরি রাধা বিদ্যা মন্দিরে' ছাত্রছাত্রী এবং অভিভাবকদের নিয়ে আয়োজিত অনুষ্ঠানে প্রধান অতিথি হিসাবে যোগ দেন। অনুষ্ঠানে ত্রিপুরা বিধানসভার মুখ্য সচিব কল্যাণী

সাহা রায়, খোয়াই জেলার জেলাশাসক চাঁদনী চন্দ্রন, জেলা পুলিশ সুপার রমেশ কুমার যাদব সহ অন্যান্য বিশিষ্ট জনেরা উপস্থিত ছিলেন। রাজ্যপাল তাঁর বক্তব্যে ছাত্রছাত্রীদের ডিগ্রী অর্জনের পাশাপাশি একটি নির্দিষ্ট লক্ষ্য নিয়ে এগিয়ে যাবার পরামর্শ দেন।

\*\*\*\*\*

Padma puraskar

২০২৫-এর পদ্ম পুরস্কারের জন্য মনোনয়ন আগামী ১৫-ই সেপ্টেম্বর পর্যন্ত গ্রহণ করা হবে। আগ্রহী ব্যক্তির রাষ্ট্রীয় পুরস্কার পোর্টাল <http://awards.gov.in> - এ গিয়ে মনোনয়ন জমা দিতে পারবেন। তিনটি বিভাগে পুরস্কার দেওয়া হয়। ব্যতিক্রমী ও বিশেষ সেবার জন্য পদ্ম বিভূষণ, সর্বোচ্চমানের বিশেষ সেবা দেয়ার জন্য পদ্ম ভূষণ এবং যেকোন ক্ষেত্রে বিশেষ সেবার জন্য পদ্মশ্রী পুরস্কার দেওয়া হয়ে থাকে।

\*\*\*\*\*

**Oath Taking :**

রাজ্যের নতুন লোকাযুক্ত হিসেবে শপথ নেন ড. বিভাস কান্তি কিলিকদার। রাজভবনের দরবার হলে তাকে শপথ বাক্য পাঠ করান রাজ্যপাল ইন্দ্রসেনা রেড্ডি নাগু। শপথ গ্রহণ অনুষ্ঠানে উপস্থিত ছিলেন মুখ্যমন্ত্রী অধ্যাপক ডা: মানিক সাহা, মুখ্যসচিব জে কে সিনহা, রাজ্য পুলিশের মহানির্দেশক অমিতাভ রঞ্জন, নবনিযুক্ত লোকাযুক্ত পরিবারের সদস্য সদস্যগণ সহ বিভিন্ন দপ্তরের সচিব ও অধিকর্তাগণ।

\*\*\*\*\*

## **National Film Awards :**

নতুনদিল্লিতে ২০২২ সালের ৭০তম জাতীয় চলচ্চিত্র পুরস্কার ঘোষণা করা হয়েছে। নন-ফিচার ফিল্ম বিভাগে, আয়না সেরা ছবির পুরস্কার জিতেছে। ফিচার ফিল্ম বিভাগে সেরা হিন্দি ছবির পুরস্কার জিতেছে গুলমোহর।

ঋষভ শেঠি তার কন্নড় ছবি কান্তারার জন্য সেরা অভিনেতার পুরস্কার জিতেছেন। হরিয়ানভি ফিল্ম ফৌজা নন-ফিচার ফিল্ম বিভাগে সেরা গানের পুরস্কার জিতেছে। সেরা গায়কের পুরস্কার পেয়েছেন অরিজিৎ সিং।

\*\*\*\*\*

## **ISRO :**

ফের একবার রেকর্ড গড়ল ভারতীয় মহাকাশ গবেষণা সংস্থা বা ইসরো। গতকাল সকালে ভূ-পর্যবেক্ষণ উপগ্রহ-এসএসএলভি-ডি৩/ইওএস-০৮ সফলভাবে উৎক্ষেপণ করেছে ভারতীয় মহাকাশ গবেষণা সংস্থা। সকাল ৯টা ১৭ মিনিটে অন্ধ্রপ্রদেশের শ্রীহরিকোটার সতীশ ধাওয়ান স্পেস সেন্টার থেকে এসএসএলভি এই উপগ্রহ নিয়ে মহাকাশে পাড়ি দেয়।

এই সাফল্যের পর ইসরোর চেয়ারম্যান এস সোমনাথ বলেছেন, "এসএসএলভি-ডি৩/ইওএস-০৮-এর তৃতীয় উৎক্ষেপণ সফলভাবে সম্পন্ন হয়েছে। রকেটটি মহাকাশযানকে পরিকল্পনা অনুযায়ী অত্যন্ত সুনির্দিষ্ট কক্ষপথে স্থাপন করেছে।

প্রধানমন্ত্রী নরেন্দ্র মোদী এই উৎক্ষেপণ সফল হওয়ায় ইসরোকে অভিনন্দন জানিয়েছেন।

\*\*\*\*\*

### **Assembly Poll-J&K :**

নির্বাচন কমিশন জম্মু ও কাশ্মীরে বিধানসভায় নির্বাচনের নির্ঘন্ট ঘোষণা করেছে। ভোট গ্রহণ করা হবে তিন দফায়। প্রথম দফার ভোট হবে ১৮ই সেপ্টেম্বর, দ্বিতীয় দফা ২৫শে সেপ্টেম্বর এবং পয়লা অক্টোবর তৃতীয় দফার ভোট। ফল ঘোষণা চৌঠা অক্টোবর। গতকাল বিকেলে মুখ্য নির্বাচন কমিশনার রাজীব কুমার ভোটের এই নির্ঘন্ট ঘোষণা করেন।

\*\*\*\*\*

### **Amrit Udyan :**

রাষ্ট্রপতি ভবনের অমৃত উদ্যান সর্বসাধারণের জন্য গতকাল থেকে খুলে দেওয়া হয়েছে। জনসাধারণের দর্শনের জন্য আগামী ১৫ই সেপ্টেম্বর পর্যন্ত উন্মুক্ত থাকবে অমৃত উদ্যান। রাষ্ট্রপতি দ্রৌপদী মুর্মু গত বুধবার রাষ্ট্রপতি ভবনে বার্ষিক গ্রীষ্মকালীন অমৃত উদ্যানের সূচনা করেছেন। দর্শকরা এই উদ্যান থেকে পরিবেশবান্ধব বিভিন্ন স্মারকও সংগ্রহ করতে পারবেন।

\*\*\*\*\*

### **Arshiya:**

শ্রীলঙ্কায় আয়োজিত কমনওয়েলথ দাবা প্রতিযোগিতায় রাজ্যের আন্তর্জাতিক দাবাড়ু অর্শিয়া দাস অংশ নেবে। আগামী ২৮ আগস্ট থেকে ৫ সেপ্টেম্বর পর্যন্ত হবে আসর। এই আসরে অনূর্ধ্ব-১৪ বছরের বিভাগে খেলবে উত্তরপূর্বের প্রথম মহিলা ক্যান্ডিডেট

মাস্টার আর্শিয়া। এদিকে, খেল ফাউন্ডেশনের পক্ষ থেকে আর্শিয়াকে সংবর্ধনা জানানো হয়। ফাউন্ডেশনের আগরতলা শাখার সদস্য অভিজিৎ দাস ২৫ হাজার টাকার চেক তুলে দেন।

\*\*\*\*\*

Rakhal Shild:

ত্রিপুরা ফুটবল এসোসিয়েশন পরিচালিত রাখাল শিল্ড ঘরোয়া নকআউট ফুটবল প্রতিযোগিতায় লালবাহাদুর ব্যায়ামাগার কোয়ার্টার ফাইনালে উঠেছে। উমাকান্ত মিনি স্টেডিয়াম গতকাল নৈশালোকে অনুষ্ঠিত খেলায় লালবাহাদুর ব্যায়ামাগার ১-০ গোলে টাউন ক্লাবকে পরাজিত করে। গোলশূন্য প্রথমার্ধের পর খেলার ৬৫ মিনিটে বিজয়ী দলের বিশ্বজিৎ দেববর্মা জয়সূচক গোলটি করে।

\*\*\*\*\*

**Weather :**

আজ আকাশ সাধারণত মেঘাচ্ছন্ন থাকবে। রাজ্যের সবকটি জেলায় মাঝারি পর্যায়ের বৃষ্টিপাতের সম্ভাবনা রয়েছে। আজ দিনের তাপমাত্রা সর্বোচ্চ ৩২ ডিগ্রি সেলসিয়াস এবং সর্বনিম্ন ২৬ ডিগ্রি সেলসিয়াসের কাছাকাছি থাকবে। আজ ভোরে সর্বনিম্ন তাপমাত্রা ছিল ২৬.৩ ডিগ্রি সেলসিয়াস। আগামী ২৪ ঘন্টায় উত্তর , উনকোটি ধলাই ও খোয়াই জেলায় বজ্র বিদ্যুৎ সহ ভারী বৃষ্টিপাতের সম্ভাবনার কথা জানিয়েছে আবহাওয়া দপ্তর।

\*\*\*\*\*